



Impuls vom 07.02.2026

der Pastoralen Einheit Köln-Ehrenfeld

Bickendorf Bocklemünd Ehrenfeld Neu-Ehrenfeld Mengenich Ossendorf

„Ihr sid dat Salz vun d'r Äd, ihr sid dat Leech vun d'r Welt!“ – su die Wööt us dem Evangelium vom 5. Sundach im Johr. Die Wööt vun domols sin och hüeck zo uns jesproche. Jedereine vun uns es Salz, es Leech – de Kirch soll Salz un Leech sin in de Welt.

Doch mänchensmol künnt mer meine, dat se he und do selv et Leech usjemaat un dem Salz dä Jeschmack jenomme hät. Et litt an uns dat Leech widder anzemaache, un Salz ze sin. Su wie et in dem schöne Kircheleed jesunge weed:

„Ehr sid et Leech em Düüstere vun der Welt,
Ehr sollt et Salz en der Zupp sin.

Maat däm, dä söhk, singe schwere Wääch daachhell.“

Leech un Salz ... Leech un Salz, sin all die Fraue un Männer die sich engagiere dun en de Faar. Zom Beispill: In Kirchevörständ un Pfarrjemeinderot. Dat sin die Pänz un Jugendliche in d'r KJG, bei de Pfadfinder un die Messdeener. Dat sin Lück en de Caritas.

Salz un Leech sin uns Kinderjädens, in denne mer ersöke klein Pänz op ene jode Wääch ze bringe. Salz un Leech es do, wo mer et Evangelium in et Levve bringe; wo Minsche sich för Minsche insetze. Salz un Leech es die Aat un Wies wie mer bei uns Joddesdeens fieren deit.

Mer bruche unser Leech in Bocklemünd, Mengenich, Vujelsang Bickendörp, Ossendörp ov om Ihrefeld nit unger de Emmer ze stelle. Mitenein es uns uns Kirch un uns Faar evvens nit ejal!

Mer all han bei uns uns Däuf dat Leech Joddes empfangen, et wood anjemaat an d'r Poschtekääz, dem Zeiche dat Jesus nit em Dud jeblivve es un vun sich sät: „Ich ben dat Leech d'r Welt.“

En Kääz die brennt weed immer winnijer. Wä alsu Leech es un för andere sin will muss och immer vun sich selvs jevve.

Janz, janz fröher (bis 1962) han se klein Quös die jedäuf woote, Salz op et Züngelche gestreut. Die wäde jespeit han ... Doch die Jedäufte sullte Dosch han, noh d'r Wööt us dem Evangelium.

Wööt die uns Moot maache, Wööt die uns de Angks nemme, Wööt die uns frei maache. Wenn mer Jesus un singem Evangelium treu blieve, kann uns Kirch och widder die Kirch weede, die se sin sull. Dann es se Leech un Salz för de Welt.

Hätzliche Jröß
Horst Eßer, Diakon